

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
KANTONALNO TUŽILAŠTVO
ZENIČKO-DOBOJSKOG KANTONA**

**Broj: T04 0 KT 0059559 24
Zenica, 19.05.2025. godine**

**OPĆINSKOM SUDU U TEŠNJU
-Sudiji za prethodno saslušanje-
TEŠANJ**

Na osnovu člana 45. stav 2. tačke i) u vezi sa članom 241. stav 1. Zakona o krivičnom postupku Federacije Bosne i Hercegovine ("Službene novine Federacije Bosne i Hercegovine", broj: 35/03, 37/03 ... 74/20, u daljem tekstu "ZKP F BiH"), podižem:

O P T U Ž N I C U

Protiv:

M. A., neosuđivan,

što je:

dana 12.07.2024. godine, oko 12:10 sati, u mjestu M., općina Doboj Jug, upravljajući putničkim motornim vozilom marke „...“ ..., registarskih oznaka „...“, vlasništvo „...“, krećući se ulicom ... koja ulica, pod pravim uglom, nailazi na magistralni put M-17, kao put s prvenstvom prolaza, propustio postupiti u skladu sa saobraćajnom signalizacijom, svjestan da tako vozeći može ugroziti javni promet i dovesti u opasnost živote ljudi i imovinu, ali je olako držao da zabranjena posljedica neće nastupiti ili da će je moći spriječiti, pa je postupajući suprotno odredbama člana 49. stav 4. Zakona o osnovima bezbjednosti saobraćaja na putevima u Bosni i Hercegovini¹ i odredbi člana 29. stav 2. Pravilnika o saobraćajnim znakovima i signalizaciji na cestama² preduzeo radnju uključivanja vozilom kojim je upravljao na magistralni put s prvenstvom prolaza M-17 na mjestu na kojem je prema horizontalnoj saobraćajnoj signalizaciji i to saobraćajnom znaku izričite naredbe „obavezno zaustavljanje“ bio u obavezi prethodno zaustaviti vozilo i dati prednost svim vozilima koja se kreću cestom na koju nailazi, što nije učinio, već je započeo radnju prelaska magistralnog puta M-17 u pravcu ulice 21. august kada je u saobraćajnoj traci namijenjenoj za saobraćaj vozila iz pravca Zenice u pravcu Doboja, oduzeo pravo prvenstva prolaza putničkom motornom vozilu marke „...“ tip „...“ registarskih oznaka „...“ kojim je upravljala N. Š., a kretala se magistralnim putem iz pravca Zenice u pravcu Doboja, kojom prilikom je došlo do naleta i udara prednjeg dijela vozila marke „...“ tip „...“ sa desnom bočnom stranom vozila marke „...“ ..., i time tako ugrozio bezbjednost javnog saobraćaja, usljed kojeg udara je saputnik u vozilu „...“ tip „...“ S. Š. zadobila povrede u vidu preloma lijeve nadlaktične kosti i povredu radijalnog nerva na nadlaktici koje povrede po svom sveukupnom dejstvu na život i zdravlje organizma predstavljaju teške tjelesne povrede,

¹ ("Službeni glasnik Bosne i Hercegovine", brojevi: 6/2006, 75/2006 - ispr, 44/2007, 84/2009, 48/2010, 48/2010 - dr. zakon, 18/2013, 8/2017, 89/2017, 9/2018, 46/2023 i 88/2023)

² Pravilnika o saobraćajnim znakovima i signalizaciji na cestama, načinu obilježavanja radova i prepreka na cesti i znakovima koje učesnicima u saobraćaju daje ovlašćena osoba

dakle, kao učesnik u saobraćaju na putevima koji se ne pridržava saobraćajnih propisa, time tako ugrozio javni saobraćaj, da je doveo u opasnost živote ljudi, pa je zbog toga prouzrokovao tešku tjelesnu ozljedu jedne osobe,

čime je počinio krivično djelo Teška krivična djela protiv sigurnosti javnog prometa iz člana 336. stav 3. u vezi sa članom 332. stav 3. u vezi sa stavom 1. Krivičnog zakona Federacije Bosne i Hercegovine ("Službene novine Federacije Bosne i Hercegovine", broj: 36/2003, 21/2004, ... , 31/2023, u daljem tekstu "KZ F BiH").